

**MESYUARAT PEGAWAI KANAN ASEAN
KUALA LUMPUR
29 APRIL 2025**

Kementerian Luar Negeri telah menganjurkan Mesyuarat Pegawai Kanan ASEAN (*Senior Officials' Meeting – SOM*) pada hari Selasa, 29 April 2025 di Hotel InterContinental Kuala Lumpur. Sebagai sebahagian daripada siri Mesyuarat SOM ASEAN ini, tiga (3) mesyuarat peringkat SOM telah diadakan, iaitu Mesyuarat Pegawai-Pegawai Kanan ASEAN, Mesyuarat Jawatankuasa Eksekutif Zon Bebas Senjata Nuklear Asia Tenggara (SEANWFZ Excom), dan Mesyuarat Kumpulan Kerja Majlis Penyelarasan ASEAN ke-18 mengenai Permohonan Keanggotaan ASEAN oleh Timor-Leste (ACCWG-TL). Mesyuarat-mesyuarat ini telah dipengerusikan oleh YBhg. Dato' Sri Amran Mohamed Zin, Ketua Setiausaha Kementerian Luar Negeri selaku Pegawai Kanan ASEAN-Malaysia.

Mesyuarat SOM dan SEANWFZ ExCom melibatkan penyertaan Pegawai-Pegawai Kanan dari Negara Anggota ASEAN, manakala Mesyuarat ACCWG-TL pula telah disertai oleh wakil SOM Tonggak Komuniti Ekonomi dan Sosio-Budaya ASEAN, serta Timbalan-Timbalan Setiausaha Agung ASEAN ketiga-tiga Tonggak. Selain itu, Pegawai Kanan Timor-Leste juga telah menyertai mesyuarat-mesyuarat tersebut sebagai Pemerhati.

Mesyuarat SOM telah membincangkan usaha memperkukuh pembangunan Komuniti ASEAN, termasuk Visi Komuniti ASEAN 2045 yang akan diperakukan di Sidang Kemuncak ASEAN Ke-46 pada 26 Mei 2025. Dalam hal ini, Pegawai Kanan ASEAN telah memberikan penghargaan kepada Pasukan Petugas Peringkat Tinggi dalam memuktamadkan Visi Komuniti ASEAN 2045 dan pelan-pelan strategik politik-keselamatan, ekonomi, sosio-budaya dan kesalinghubungan. Mesyuarat ini turut membincangkan progres implementasi Pelan Hala tuju Kemasukan Timor-Leste ke ASEAN, permohonan negara-negara luar ke dalam Triti Persahabatan dan Kerjasama di Asia Tenggara (Treaty of Amity and Cooperation in Southeast Asia - TAC) dan hubungan luar ASEAN.

Mesyuarat SEANWFZ Excom telah memberi fokus kepada usaha berterusan ASEAN dalam memajukan agenda perlucutan senjata di peringkat global, termasuk matlamat jangka panjang untuk memastikan penyertaan Negara-Negara Pemilik Senjata Nuklear kepada Protokol SEANWFZ, sekali gus memperkukuhkan kedudukan undang-undang Perjanjian ini serta kepimpinan ASEAN dalam mempromosikan rantau yang bebas senjata nuklear.

Mesyuarat ACCWG-TL telah memfokuskan kepada usaha berterusan ASEAN untuk mempercepatkan keanggotaan penuh Timor-Leste ke dalam ASEAN. Perbincangan telah menilai kemajuan pelaksanaan Pelan Hala Tuju Keanggotaan Timor-Leste, memperkukuh inisiatif pembangunan kapasiti untuk pegawai-pegawai Timor-Leste, serta menyokong penubuhan Unit Timor-Leste di Sekretariat ASEAN. Malaysia kekal komited untuk bekerjasama rapat dengan Negara-Negara Anggota ASEAN dan Timor-Leste bagi melancarkan lagi proses tersebut.



WISMA PUTRA
www.kln.gov.my

SIARAN AKHBAR

064/2025

UNTUK SIARAN SERTA-MERTA

Sebagai sebuah blok yang perlu kekal relevan dan kukuh terutamanya dalam menghadapi pelbagai cabaran mendatang, perbincangan pada mesyuarat-mesyuarat SOM ASEAN kali ini akan memastikan usaha yang lebih bersepadu, inklusif dan mampan yang berobjektifkan memperkukuh keamanan, kestabilan dan kemakmuran serantau.

PUTRAJAYA
29 April 2025